

## ЖАҢА ФОРМАТТАҒЫ ЖЫР КЕШІ (Т.АЙБЕРГЕНОВКЕ АРНАЛҒАН «О, АДАМДАР, БІРГЕМІН МЕН СЕНДЕРМЕН» АТТЫ ЖЫР КЕШІ ТУРАЛЫ ҮЗІК СЫР...)

**Б.И.Нұрдәuletова,**  
*филология ғылымдарының докторы,  
профессор*

2020 жылдың 15 мамырында, танымдық, мәдени шаралар елімізде короновирусқа байланысты жаппай онлайн жүйеге көшірілгенін білесіздер. Сол тұста Қазақстан Республикасы Ақтау қаласындағы Ш.Есенов атындағы КТИУ және Алматы қаласындағы Абай атындағы ҚазҰПУ ұйымдастыруымен ақын Төлеген Айбергеновтің шыгармашылығына арналған «О, адамдар, біргемін мен сендермен!» атты әдеби танымдық кеш өтті. Кешке ақынның қызы ф.ә.к., доцент Салтанат Айбергенова қатысын, естеліктерімен бөлісті. Белгілі актер Б.Есенәлиев ақын өлеңдерін оқыды, танымал әншілер С.Жаннейісова, Г.Сарина, Ә.Бекарыстанов, Ә.Әміров, А.Қошеров ақын өлеңдеріне жазылған әндерді орындады, Абай атындағы ҚазҰПУ профессоры Алтысбай Тамаев, Нәкіс университетінің оқытушысы Ә.Найзабаев Төлеген шыгармашылығына ғылыми талдау жасады. Ш.Есенов атындағы КМТИУ докторантты Б.Жайлай арнау өлең оқыды. Кеш соңында студент-жастар Т.Айбергенов өлеңдерінен көркем сөз оқыды. Тікелей эфирде Қыргызстаннан, Өзбекстаннан, Қазақстанның түкпір-түкпірінен ғылым мен мәдениет саласы өкілдері қатысын, әсерлерімен бөлісін отырды».

Қазакта: «Әр патшаның тұсында бір сұрқылтай» деген сөз бар. Академик Рәбиға Сыздықтың түсіндіруінше, сұрқылтай, дұрысы сұрғалтай «білімді, оқымысты адам» дегенді білдіреді еken, әр патшаның өзіне лайық ақыл-кенес беріп, жол сілтейтін сұрқылтай болады деген сөз. Біздің заманымыздың «сұрқылтайы» бүгінгі күні өміріміздің бір бөлшегі болып бара жатырған интернет-технология десек, қателесе қоймаспыз. Статистердің көрсетуінше, фейсбуекті пайдаланатындар саны Қазақстанда 2 млн-нан асyp түссе, инстаграм жанкүйерлері 1,5 млн-ға жетіп жығылатын көрінеді. Бұдан 2-3 жыл бұрын «ақпараттық технология», «цифрандыру», «виртуалды кеңістік» деген ұғымдар біз сияқты «гуманитарлар» үшін алыстағы, қолжетімсіз әлем болып көрінсе, қазір виртуалды әлемнің түрлі белгілері ой-санамызды жаулай бастағанын еріксіз мойындауға тура келеді.

Қазақтың тағы бір дана сөзі: «Жеті жамандықтың да бір қайыры бар» деген. Бүкіл адамзат болып аты жаман дертпен арпалысқанымызға екі айдың жүзі болыпты. Үйқамақтың (Маңғыстауда «мырзақамақ» деген нұсқасы бар) еріксіз тұтқыны болған екі айда адамдар қайта түлеген Феникс сияқты, өмірге әлдеқайда басқаша көзben қарай бастағандай сезіледі. Адамдар бір-бірін, қызу тіршілікті, табиғатты сағынып оянғандай. Қазақ поэзиясына өзгеше өріс, тың тыныс, рухани төңкеріс ала келген айтұлы ақын Төлеген Айбергеновтің шыгармашылығына арнап,

Ақтаудағы Ш.Есенов университеті мен Алматыдағы Абай атындағы ҚазҰПУ бірігіп ұйымдастырган «О, адамдар, біргемін мен сендермен!» атты әдеби танымдық кеш сондай ұлы сағынудың бір көрінісі болды. Себебі Төлегеннің өзі: «Сағыныш жайлы қайтадан толғау болар да бәлкім қолайсыз, Дегенмен, жаным, көгілдір дүние сағынбағасын арайсыз. Өмірде мынау сағынбағандар бақытсыз, бақсыз, талайсыз, Қазақтың жыры Абайсыз...» деп күллі дүниеге сағынышын тауыса алмай, сағыныштың қуатынан жанып кеткен, ерте үзілген ерекше ақын ғой.

Әрине, «заманына қарай амалы» дегендей, кешіміз ZOOM жүйесінде және фейсбук желісінде тікелей эфирде өтті.

Кештің бас қонағы, ақын: «Үйлендім. Балалықтан із қалмады, Жаңа өмір қол бұлғады бізге алдағы. Өмірге сен келдің де, гүлін жарды, Менің жас семьямның қызығалдағы», – деп, алғашқы әкелік жырын арнаған тұлабойы тұнғышы, филология ғылымдарының кандидаты, доцент Салтанат Айбергенова болды.

Қазақстанның, Қырғызстанның, Өзбекстанның мәдениет және өнер қайраткерлері, айбергеновтанушы ғалымдар, ақындар, ұлық поэзияның жанкуйерлері «виртуалды әлемнің» өлең атты мәртебесінде мәртебелі жиын өткіздік. Рас, «заманың түзу кезі» болғанда, Төлеген ақынның жыр кеші Мұнаралы Маңғыстаудың төрінде, «Көшелерінде бояулар шіркін мол қандай, Құдай да болсан, қарай алмайсың толғанбай. Жан-жағы толқын, Терезесінен теңізге, Секіріп кетсе болғандай», – деп Төлеген жырлаған ақшағалалы Ақтаудың салтанатты сарайларының бірінде дүбірлеп өтіп жатар еді. Сәуле Жанпейісоваға «Ақжайындарды» айтқызып, Гүлмира Саринаға «Сағынышты» салғызып, Байғали Есенәлиевтің орындауында «Ақындық», «Бір жетсе менің ажалым жетедіні» тыңдал, Асанәлі Көшеровтің «Ақерке Ақжайықты» айтқан әсем үніне елтіп отырмас па едік. Сол кезде Әбдірайым Өміров ақын ағаға арналған «Төлегенмен сырласу» әнін сыйылтса, жас ақын Бақтыбай Жайлау: «Қауышты Каспийіне сағынышпен, Жүректегі жанартай-жарылыспен. Теніз де тебіреніп, қарсы алды ұлын, – Көретін Сағыныштың заңын үстем...» – деп өлең оқыр еді. Төлеген Айбергеновтің қүйеу баласы, ақын Бауыржан Жақыповтың арнау өлеңін тыңдаудың да сәті түсер еді. Ақынның сағынышты жырына сусаған Маңғыстау бір серпіліп қалар еді... Бірақ үстіміздегі жылдың 15 мамыры қуні ақын өлеңдері бір Маңғыстауды емес, екі миллион көрермені бар фейсбукті сілкінні. 820 адам фейсбук парақшасында кешіміздің куәсі болып, ZOOM жүйесінде 30 адам тікелей қатысып, пікір білдіріп, сұрақ қойып отырды.

Кеште ақынның перзенті әрі ақын шығармашылығын зерттеуші ретінде Салтанат Айбергенова әкесі туралы тың естеліктермен бөлісті:

– Талантты ақын – ұлттың болмысы. Бірақ бұл бақыт кез келгеннің қолына түсे бермейтіні баршамызға аян. Көбіне таланттар өнермен ғана өмір сүріп, ғұмырын соған қияды, оның да нәтижесі аян: шеккен шынайы азап, жан құлшынысы бекерге кетпейді – мұраң мәңгілік сөресіне қойылады. Менің әкем Төлеген Айбергенов те – сондай мұрасы келер ұрпаққа аманат болып қалған ақындардың бірі. Ақын өмірі уақытпен, замана екпінімен өлшенбейді. Олар әр ұрпақпен бірге жасайды. Мен мұны әкем болғандықтан емес, артында қалдырған шағын болса да салмағы зор шығармашылығы арқылы айтып отырмын, – дейді Салтанат Төлегенқызы.

Ақынның өмірі де, өлеңі де жұмбақ әлем, сол әлемнің үзік сырларын басқа емес, ақынның перзентінің аузынан тындаудың өзі бір ғанибет. Ақын өлеңдерінің шығу тарихы әрқайсысы бір ғажап ертегідей. Салтанат айтқан үзік сырлардың ішінен «Сыр» өлеңінің туу тарихы кәдімгі «Мың бір тұнге» бергісіз, анау-мынау көркем әңгімеге сұранып тұрғандай.

– Мамам мен әкем бір курста оқиды, кейде сабакқа бірге дайындалады. Ол кезде кітаптың да тапшы кезі. Екеуінің де бір-біріне деген көңілдері таза, араларында үлкен сыйластық, достық бар. Неге еkenі белгісіз, жазғы демалыстан әкем көңілсіз оралады. Ештеңеге онша зауқы жоқ. Мамам не болғанын сұрауға бата алмайды, бірақ бір сыр бар еkenі анық. Бір күні әкем өзінен-өзі: «Үрниса, мен саған айта алмай жүрген бір сырым бар еді», – дей бергенде, мамамның жүрегі зу етіп, «тындау керек пе, жоқ па?» деген ой сап ете қалады. Не де болса, білейін деп, «Иә, айт!» – дейді. Әкем бірден баяндауға көшеді: «Менің әкем кезінде туған жерінде сегіз құлышты ұстаған абыройлы кісі болған. Сол бастық болып тұрғанда, нағашы жүртүм Әлімбетовтермен жақсы араласқан.

Сен ол кісінің атын естідің бе, жоқ па, Мойнақтағы балық заводының бастығы болып қызмет атқарған. Сол кісінің менен жасы сәл кішілеу Дариға дейтін қызы болатын. Біз оны Даша деп атайдыныңыз. Сол Дашаны маған айттырмақшы болады. Сөйтіп жүргенде менің әкем қайтыс болып кетті де, мен жетім қалдым. Тұрмысымыздың төмендігінен, онжылдықты балалар үйінде бітірдім. Биыл сол қыздан дәмеленіп ауылға барсам, ол бір ірі қызметте істейтін кісінің баласына тұрмысқа шығып кетіпті. Мен ол қызды ұнататынмын, бірақ ашып сөз айтқан емеспін. Естігенде, ішім оттай жанды. Бұл жерде бәріне тағдыр кінәлі шығар. Өзім жетім болған соң, батылым барып хат та жаза алмадым», – деп күрсінеді. Мамам

ештеңе демей, ішінен аяйды да, бірақ білдіртпейді. Арада жылдар өтіп оқуды бітірер шақ та жақындайды. Қалтқысыз достық бара-бара махабbatқа ұласып анам екеуі отау құрады. Дариға жөніндегі тақырып содан кейін қозғалмайды. Бірде мамам мен әкем Ташкентте тұратын кіші нағашысының үйіне қонаққа барады. Кіші нағашы деп отырғанымыз – Дариғаның әкесінің інісі. Ол кісінің әйелі – белгілі ғалым, жазушы Әзиза Нұрмаханова. Сол Әзиза апамыздың үйіне Дариға да күйеуі Орақпен бірге келеді. Дариғаны көргенде әкем балалық шағы есіне түсті ме, жоқ әлде бозбала шақтағы сезім қылаң берді ме, көңілденіп сала береді. Естеріне өткен-кеткенді алып екеуі де мәз-мейрам. Дастанхан басында Мұхаметқали аға да Дариғаның күйеуінен ыңғайсызданған болуы керек, «мына жігіт т, біздің жиен, аты Төлеген», – деп таныстырыады. Дариғаның күйеуі бір салмақты адам екен. Әкемдер көп ұзамай, Алматыға да көшіп келеді. Көшіп келді деген аты болмаса, әлі үй де ала қоймаған. Сол үй іздеу қамында жүргенде, Дариға да анасымен, інісімен Алматыға қонаққа келгенін естиді. Ол кезде үй де табыла қоя ма, әрең дегенде Алатау деген жерден (қазіргі Байсейітов пен Абай көшесінің оң жақ беті) үй табылып, соны сатып алып, кірген күні Дариғаларды қонаққа шақырса, олар ауылдарына қайтып кетіп қалған екен. Бұған әкем қатты қиналып қалады да, содан бірер күнде «Сыр» деген өлеңін жазады.

Құм басқан меңіреу шөлдерде,  
Атылып қалған армандай,  
Сен жақтан тоғыз толғанда ай,  
Тоқтады хаттар ормандай.

Тоқтады хаттар мертігіп,  
Қанаты сынған кептердей,  
Бұрауы тұспей шертіліп,  
Үзіліп кеткен шектердей...

Жаныма қап ең жақын боп,  
Жүректе бүгін сыздау көп.  
Мен болсам, кеттім ақын боп,  
Азырақ бақытсыздау боп, –

деп, ақынды аһы ұрғызған арманды арудың «Сыры» осындай екен!

Төлеген шығармашылығында Манғыстау тақырыбы айрықша. Ақынның Шемшіге арнауында: «Қойнына сұксыр жасырған шалғай көл жағасындағы

жекендей, Бұл өзі бізді ынтызар қылған мекен ғой. Табанын мынау мұнайға басқан мұнараларға қараши, Аспан дегенің қашық та емес екен ғой..» – деп жырлаған, «Кезім менің! Жатырсың жырақты ашып, Қызыл гүлді барады қыр ап қашып. Жиырмасыншы ғасыр жүр Маңғыстауда, Мұнаралар басына шырақ тасып!» – деп толғанған, «Мен қара төспін, қайғыдан бақыт жасаған, Шатырлап жатқан найзағайлы аспан босағам, Мен жарық Жермін Жаңғырықтарға үн қосқан, Төбемді көрсө түн қашқан!» – деп шамырқанған, «Қателессең тартып отырған күйінен, Керілдесіп қалады екен Адайлар. Шақыртып алып ару қыздарын сонан соң, Бармағынан от ойнар, Қүй сұрайды екен атойлар», – деп тамсанған жырлар ақынның осынау қастерлі мекенге деген шексіз маҳаббатын танытса керек. Бұл жырлар қазіргі Маңғыстау жастарының әнұранына айналған.

Ақынның Шәмшімен бірге Маңғыстауға келуі өз алдына бір қызықты хикая. 55 жыл өтсе де Маңғыстаудың ойы менен қырында ақызы әлі өшкен жоқ.

«Көкірегі толы күмбір жырлары қоңыраулатқан» (Фариза) Төлеген ақын мен ән патшасы Шәмші келгенде, Маңғыстау елі төбелеріне көтерген, Өтежан Алшынбаев, Танаш Мендібаев, Шүкіrbай Асанов, Лазарь Елмұханбетов, Ізбасар Шыртанов, Жетібай Жылқышиев т.б. жаны жайсаң жігіттер ақын мен әншінің жанында жүрген. Шевченко (Ақтау), Өзен, Жетібай, Таушықта болып, Маңғыстаудың ойы мен қырын жаңғыртып өлең оқыған, ән салған. Төлегеннің:

Таушықтың сансыз тауында  
Тұлпарлар қалды ақтабан.  
Жайықтың жағалауында  
Қарағай қалды қаптаған.

Қарадым көкке кезелген  
Мұнараларға міз бақпай,  
Жетібай менен Өзеннен  
Шатырлап өттім тұзгі оттай, –

деген ерте көктемнің найзағайында жарқ-жүрқ еткен жасын жырлары сонда туған. Маңғыстаудың ойындағы Шынжыр төрткүлдің басында да гулеген жиын болған, «тұзгі оттай» шатырлаған өлеңдер оқылған. Сол оттардың жаңғырығы «ұрған» осы өңірдің перзенті, айтулы Айт-Ман (Светқали) ақын: «Көгілдір қырдың қанатын керегем керіп, Тыраулап тырна бастаған төбеден жорық. Мұнаралы қырдың жұпары бұрқ етті бір күн, Алматы жақтан Шәмші мен Төлеген келіп...» деп жыр төккен. «Ән қалды тұнгі аққудың сұңқылында аққан, Жыр қалды талдың

бүрінде кірпігін қаққан. Төлеген-жыр мен Шәмші-әнге елітіп сонда, Сәби ек біздер бесікте бұлқынып жатқан» дей келіп: «Ән мен Жыр болып біз енді толғанамыз да, Қараймыз толқып мұнарлы сар даламызға. Бастаймыз сосын сапарды – жалғанамыз да, Төлеген менен Шәмшіден қалған Аңызға» деп өзі түйіндеңдегендей, ол Төлеген-жырдың рухы қалған Шынжырда 4 том поэзиялық жинақ дуниеге келтіріп, оның ішінде бірнеше жырын Төлегенге арнаған.

Төлеген-жыр тәрізді туысқан Қарақалпақстан елінен атамекен Маңғыстауына шалдығып жеткен, Төлеген жырларына оранып, сабылып жеткен филология ғылымдарының кандидаты марқұм Рахмет Аябергенов Төлегеннің тұтас поэзиясын жатқа оқып, тұма бұлақтың тұнығына бойлап, кейін Төлеген Айбергенов шығармашылығына арналған зерттеу еңбек жазған.

Әлқисса, жыр кешімізге қайта оралайық...

Әлеуметтік желіні жаңғыртып Төлеген өлеңдеріне жазылған әндер орындалды. Ақын жырлары оқылды. Естеліктер айтылды. Педагогика ғылымдарының кандидаты, доцент Алпысбай Тамаев Төлеген өлеңдерінің текстологиясы, Тараздан ғалым Әлімбай Найзабай төлегентанудағы өзекті мәселелері туралы ғылыми ойларын ортаға салды.

Кештің соңында Абай атындағы Алматы ұлттық педагогикалық университетінің кафедра менгерушісі, ф.ғ.д., профессор, академик Р.Сыздықтың шәкірті Қалбике Есенованың сөзі талайлардың жүргегін қозғағаны сөзсіз.

Маңғыстаудың өте талантты перзенті Қанығул Жаманбаева деген ғалым болды. Өмірден ерте озды. Оның қазақ тіл біліміне жаңа бағыт ала келген зерттеу еңбектеріне екінің бірінің тісі бата бермейтін. Ғылым соңына түскен талай ізденушілерге қайырымы тиғен, Адай қыздарына тән өжеттік пен биязылық, ғалымға тән сарабдал сырбаздық бір бойынан табылатын ерекше жан еді. Өмірінің соңында инсульт алыш, тілі күрмеліп қалды, сонда да жұмыстан қалғысы келмедин, елге алыш кетеміз деген туыстарына көнбеді. Тілі күрмеліп, дұрыс сөйлей алмай қалғанына намыстанып, кей күндері автобусқа отырмай, Абай – Правдадағы жатахқанадан А.Байтұрсынұлы атында Тіл білімі институтына жаяу келген кездерін де көріп жүрдік.

Қалбике Өмірқызы айтады: «Институтта бір жиын болып, дастархан басында отырдық. Ән салынып, өлең оқылып дегендей... Ортамызда Қанығул бар, көп сөйлей алмайды. Кенет Қанығул орнынан атып тұрып, Төлегеннің «Сағынышын» оқи жөнелді. Тілі еш мұдірген жоқ. Бәріміздің үніміз шықпай, тілсіз қалдық. Тамағымызға өксік тығылып, көз жасымызды әзер іркіп отырмыз. Өні бал-бұл

жанып, көзі ұшқындал, Қанығуліміз өлең оқып тұрды... Кейіннен Қанығулден: «Неге басқа емес, Төлегеннің жыры?» деп сұрағанымда, Қанығул: «Төлеген мениң тағдырым ғой», – деді. Қанығул Маңғыстаудың қызы еді, содан ба екен, әлде өмірі Төлеген сияқты ерте қылатынына көрінді ме, Төлеген жырларын ерекше жақсы көрді. Тіпті күрмелген тілі де Төлегенді оқығанда бір сәтке шешіліп кетті...»

Міне, құрметті оқырман! Дерпті жүректі сауықтырып, күрмелген тілді де сайрататын қазақ өлеңінің, Төлеген-жырдың құдіретіне бас иіп, кеш туралы мөлтек сұрымызды біз де аяқтаймыз.

О, адамдар, біргемін мен сендермен,  
Ықыласыңа ешнәрсені теңгермен.  
Сендер менің бақыттымның бұлағы,  
Сендер менің дарынъя жол берген...

Гүлстанға айналдырған тақырды,  
Болат қолдар, алғыр милар ақылды.  
Сүйемін мен, сүйемін мен сендерді,  
Алар демім қалғанынша ақырғы...

деп соққан Төлеген-жүректің дұрсілі сембесін, Төлеген-жырдың жарқылы сөнбесін деп тілейік.